

UPM menang dua anugerah di MIT GSL Malaysia 2015



PESERTA Mit GSL Malaysia 2015 terdiri dari mahasiswa dan mahasiswi insitusi pengajian tinggi awam tempatan di seluruh negara.

PELAJAR Ijazah Sarjana Muda Sains Komputer (Kejuruteraan Perisian), Fakulti Sains Komputer dan Teknologi Maklumat (FSKTM), Universiti Putra Malaysia (UPM) memenangi dua anugerah di program 'MIT Global Startup Lab' (MIT GSL Malaysia) 2015, baru-baru ini.

Kumpulan tersebut yang dianggotai Anas Hasbullah, Daeng Bukhari, Abdul Ammar Rusydi dan Mohd Sharafat Shah memenangi kategori 'Audience Choice Award' dan 'Best Product Award', sekaligus membawa pulang hadiah wang tunai RM1,500 dan RM3,000.

Ketua kumpulan, Anas Hasbullah berkata, projek tersebut adalah inovasi bagi 'Queue Management System' atau lebih dikenali sebagai 'Qtime' yang diubah menjadi satu sistem berasaskan web dan aplikasi telefon pintar.

"Objektif utama kami adalah untuk mengurangkan masa menunggu pelanggan. Pelanggan akan mendapat pesanan ke telefon pintar mereka apabila giliran mereka semakin hampir.

"Qtime adalah aplikasi telefon pintar

yang berfungsi sebagai pengurusan sistem menunggu (QMS). Sistem ini akan memberi anggaran masa menunggu bagi pelanggan bermula dari masa mereka mengambil tiket sehingga masa berurusan ke kaunter," katanya.

Program tersebut merupakan kolaborasi antara Massachusetts Institute of Technology (MIT) Global Startup Lab, Amerika Syarikat, Kementerian Pendidikan Malaysia dan Talent Division, Perbadanan Pembangunan Multimedia (MDeC).

Pensyarah Kanan, Jabatan Multimedia, FSKTM, Dr. Hizmawati Madzin pula berkata, program itu dapat meningkatkan kemahiran pelajar dalam bidang keusahawanan, inovasi dan teknologi melalui inovasi serta kreativiti dalam membina teknologi relevan masa kini.

"Diharapkan program seperti ini akan mendapat penglibatan pelajar UPM dan melahirkan usahawan muda melalui kursus aplikasi telefon pintar dan teknologi internet yang diperlukan pada masa akan datang," jelasnya. - **DHIYA'ZULHILMI DAUD**